



Komunikadu Imprensa
Distritu Bobonaro
15 Janeiro 2019

Komunidade Aidabaleten preokupa ho kazu abandona labarik

Komunidade sira hosi Suku Aidabalen preokupa ho kazu abandona labarik. Preukupasaun ne'e hato'o iha 11 Janeiro 2019, liuhosi treinamentu ne'ebé organiza no fasilita hosi Judicial System Monitoring Programme (JSMP) kona-ba "Diretu Labarik Asesu ba Sistema Justisa Formal, iha Suku Aidabaleten, Sub-distritu Atabae, Distritu Bobonaro.

Total partisipante ne'ebé partisipa iha treinamentu ne'e hamutuk ema na'in 30 ne'ebé kompostu hosi feto nain 19 no mane nain 11, ne'ebé envolve xefe suku, xefe aldeia, lia-nain no joven feto ho mane sira.

Komunidade sira sente kontenti hetan treinamentu iha relasaun ho labarik asesu ba justisa formal, ne'ebé kobre asuntu sira kona-ba direitu labarik, asesu ba justisa formal, direitu labarik, obrigasaun atu proteze labarik, protesau labarik tuir kadru lei nasional no internasionál nomós konseitu kona-ba krime sira ne'ebé akontese hasoru labarik.

Durante treinamentu ne'e apresenta no diskute mós kona-ba tipu krime sira ne'ebé kuaze akontese iha comunidade no oinsa comunidade sira hahu prosesu kazu krime sira ne'e tuir sistema justisa formal. Bainhira labarik ida sai vitima ka arguidu nomós nu'udar testemuña iha kazu krime ruma. Aleinde ne'e, JSMP mós loke video kona-ba knaar Juis, Prokuradór no Defensória Públiku.

"JSMP konsiente katak comunidade sira iha área rural enfrenta dezafiu sériu kona-ba asesu ba informasaun baziku no funsionamentu instituisaun estadu sira iha área justisa formal. Tanba ne'e JSMP apresia apoiu jenerosidade hosi Embaixada Canada iha Jakarta ne'ebé finansia realizasaun atividade ne'e, dehan Diretor Ezekutiu JSMP, Luis de Oliveira Sampaio.

Treinamentu ne'e nu'udar komitmentu institusionál ida hosi JSMP hodi kontinua habelar informasaun no hasa'e koñesimentu lideransa komunitária hanesan xefe suku, lia-na'in, no representante juventude mane ho feto sira kona-ba labarik sira nia diretu asesu ba justisa formal. Iha sociedade no kontestu Timor, labarik mak ne'ebé vulneravel teb-tebes ba violénsia hosi sira ninia familia rasik tanba ne'e dalabrak defisil ba sira atu buka opsaun ne'ebé seguru liu proteze no defende sira ninia-an. Tanba ne'e, treinamentu ne'e importante no pertene tebes ba comunidade sira hodi hatene prosesu kazu ruma ne'ebé akontese hasoru labarik sira ne'ebé sai vítima tuir prosesu justisa formal. JSMP fiar katak partisipantes sira ne'ebé kompostu hosi xefe suku, aldeia no estrutura suku sira seluk sei kontinua habelar informasaun sira ne'ebá sira ninia bairu/area ne'ebé sira partense ba.

Iha abertura no enseramentu Xefe Suku Francisco Lopes agradece ba inisiativa JSMP ne'ebé bele fahe informasaun iha sira nia suku. Sr. Lopes no comunidade sira konsidera

infomasaun ne'ebé mak JSMP hato'o kona-ba direktu labarik asesu ba justisa formal ne'e importante teb-tebes. Partisipante sira mós hato'o sira nia preokupasaun durante treinamentu kona-ba kazu abandona labarik ne'ebé akontese iha sira nia suku, no oinsa mak atu hato'o keixa tuir prosesu formal. Tanba sira rejista kazu barak akontese hasoru labarik maibé sira ladun hatene oinsa atu prosesu kazu ne'e tuir dalan formal.

Relasiona ho preokupasaun ne'e, JSMP klarifika katak tuir lei penal aplikavel, normalmente ministériu públiku mak sei reprezenta labarik sira hodi husu responsabilidade paternal ba inan-aman ne'ebé abandona sira ninia oan. Artigu 225 Kódigu Penál define kona-ba obrigasaun atu fó alimentasaun ba labarik ka ema ne'ebé presiza hetan alimentasuan ka kondisaun relevante sira seluk atu satifas sira nia nesesidade. Tanba ne'e, mezmu karik inan aman fahe malu, maibé lei proteze labarik sira asesu ba alimentasaun liuhosi tribunál. Aleinde ne'e, posivelmente bele prosesa liuhosi prosesu sivíl atu husu responsabilidade paternal bazeia ba artigu 1787 Kodigu Sívil.

JSMP mós observa katak, iha diskusaun partisipante sira pro ativu teb-tebes, hodi husu kona-ba labarik ho idade menór ne'ebé envolve iha krime ruma, kazu abuzu seksuál ba menór. Relasiona ho pergunta hirak ne'e, fasilitador klarifika hodi refere ba artigu 20 Kódigu Penál kona-ba inimputabilidade tanba idade. Enkuantu ba krime abuzu seksuál ne'ebé envolve labarik vítima sira sei prosesa tuir artigu 177 Kódigu Penál kona-ba abuzu seksuál ba menór ne'ebé seidak atinze tinan 14 sei hetan pena prizaun tinan 5 too tinan 20.

Iha sesaun ikus ninia partisipante sira kria grupu diskusaun hodi halo diskusaun kada grupu no apresenta kona-ba rezultadu husi deskusaun ne'e.

Treinamentu ne'e ensera ho entrega JSMP nia *brochures* ba xefe suku Aidabaleten Fransisco Fontes Lopez.

Programa ne'e ne'e realiza tanba hetan suporta finanseiru husi Embaixada Canada iha Indonézia.

Atu hetan informasaun kle'an liu tan favór kontaktu:

Luis de Oliveira Sampaio

Diretór Ezekutivu JSMP

Telefone: 3323883 | 77295795

www.jsmp.tl